



Tir Yimyim

www.tiryimyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : [Tir Yimyim](#)

[tiryimyim@aolima](#)

[tir yimyim](#)

TAPAK 8

Soumya tepsetba ken o nung aibelener
4 taküm piyong tepuokdak ayutsü

AKTD-i ayongzükba "ASEMANG"
sentong takok nung temogo



VOL. XXI NO. 49 (ADOK 49) DIMAPUR AMUNGNÜ (SUNDAY)

YIMPOKSÜI (NOVEMBER) 26, 2023

₹ 5.00

Guwahati nung pastor ka anema FIR benok

Guwahati, November 25, 2023 (Agencies): Guwahati Police tsüngdang Beltola Fellowship of United Churches Assembly (UCA) nung pastor ka anema FIR benokogo.

Guwahati kubok Basistha tesem nung pastor jagi tanurtem dang sayatenya tanepstsü angutsü ta shia tamangba yimsü melendaktsü ta FIR nung tai tongloka lir.

Ajisüaka, Additional Sessions Judge (FTC) No 3, Kamrup Metro, Nishanta Goswami-i pastor nem interim bail temelaba agütsügo, kechiyong pa anema benokba FIR nung tesem aser mapang indang shia mali.

Sarbananda Dakua'er jabaso Nayanjyoti Dekua-i Basistha police station nung pastor Jeremiah Basumatary anema FIR benok.

Pastor Jeremiah Basumatary-i tashidak nungi tanepstsü angutsü aser Tsüngremi merenshitsü mesüra sayatenya ajanga takar akümtsü ta shia tamangba yimsü melendaktsü ta FIR nung shia lir.

Ajisüaka, okadaki "FIR nung pastor Jeremiah Basumatary-i item mapaji kodang inyak shia mali anungji interim bail agütsü" ta shiogo.

"FIR nung anogo tejangja shia mali. Ano pastor-i tanurtem dak sayatenya mapa inyaker aser idangji tim mestii kongshir ta shia

lir. Tanur karbo iba ajanga temulung yiruogo ta FIR nungsa shia lir" ta Additional Sessions Judge okadaki ashi.

"Pastor-i nisung kar tamangba yimsü melendaktsü ta shia lir, ajisüaka FIR nung pastor jagi kodang iba ozüng alema mapa inyak shia mali" ta okadaka ashi.

"Iba ken o ya IPC nung 295 kubok, Juvenile Justice Act nung section 7 kubok aser Drugs and Magic Remedies (Objective Advertisement) Act 1954 nung section 7(a) kubok benoka lir" ta okadaki metedaktsü.

"Iba ken o nung aibelena inyakba mapa tulu lir aser tai tongloka alisang ya tamangba yimsü reju ka den sendaktepa lir, iba ajanga pa bail nung chiokra jena aotsü akok. Basistha police station ken o dak sendakba metembang dang tai tongloka alisang aputsüsa kümra Rs 30,000 den sureties ana dena bail nung chioktsü" ta okadaki tetuyuba agütsü.

Tai tongloka alisangji investigation officer den amalitepa yariteptsü, FIR nung tai tongloka aliba ama sayatenya ajanga tanepstsü agütsüba maparen meinyaktsü aser tangar memesüktsü, amokmeren masüsa mesüra tenangzükba kecha magitsü ta mulung nung dang bail temelaba angutsü ta okadaka aser metedaktsügo.

Tetsür dak tashiyim inyakba anema sentong ka tenzüker



DGP Nagaland Rupin Sharma, Kohima DC Kumar Ramnikant, Secretary Social Welfare Martha R. Ritse nunger den ketdangsürtem aser shilem agirte noksa nung angur.

Kohima, November 25, 2023

(DIPR): November 25, 2023 nü International Day for Elimination of Violence Against Women nung Activism against Gender Based Violence sentong tenzükog.

Old NST Junction, Kohima nung "UNITE! Invest to Prevent Violence Against Women & Girls!" omen nung ajemdaker anogo 16 agitsüba sentong tenzükla liasü.

Iba sentong tenzükang Director General of Police, Rupin Sharma-i tangatetba shitak alir ajaki tetsürtem akhümtsübutü aser loktiliba renloktsü atema tebur-tetsür tebendang mali ta asüba tangatetba alitsü ayongzük.

"Temang tereprangtsü balala süaka tebur o tetsür kasa dang" ta pai ashi.

"Asen loktiliba nung ozüng alema inyakba aser ola madokba külemi dang aoer. Tetsürtem, kidangertem aser teloktemi ola madoki malitsüsa saka bangdakpur nem osang sangoktsütsüla" ta Kohima Deputy Commissioner Kumar

Tetsürtem aser tanur tetsürtem dak tashiyim inyakba ya women police ajanga tajungtiba inyaker saka Nagaland Police nung tetsür peria maliba ajanga mapa meinyaketer.

Anungji tarutsü anogotem sorkar reservation policy ajanga tetsür police teimba anioptsü teimla ayur. Talisa line department temia tetsürtem dak tashiyim inyakba azüoktsü atema maparen tenzüktsüla" ta DGP Rupin-isa ashi.

Ramnikant-i ashi.

DC Ramnikant-isa teburtem dang tangatetba melenshitsü aser külemi loktiliba nung tetsürtem aser tanur tetsürtem lendong nungi jenbu litettsüsa tensa bener arutsü merangtsüla ta ayongzük.

Social Welfare Secretary Martha R. Ritse-i okila jembidang "asen loktiliba nung tetsürtem dak tashiyim mapa inyakba osang nung taoksatsü keta lir aser ajak dang teimitbaji Domestic Violence lir" ta ashi.

Iba sentong ya Department of Social Welfare-i Nagaland State Commission for Women, Mission Shakti, State Hub for Empowerment of Women & BBBP aser District Administration den yaritepa ayongzük.

Nagaland sorkari Preamble nung ojang 2 agiennür azüng: NPCC

Dimapur, November 25, 2023

(TYO): Nagaland nung NDPP-BJP sorkari sangdong ka ajanga department ajak dang November 24, 2023 nü Constitution Day amongtsü aser Constitution of India nung Preamble azüngtsü tetuyuba agüja liasü.

"Iba ya mapa tajung ka liasü saka sangdong agütsüba nung züluwa aliba Preamble nung "Socialist" aser "Secular" ojantem maliasü. Iba ya Modi'er

sorkari temzung alema taküm September ita Preamble nungi kasa ojang agienba den putepa lir" ta Nagaland Pradesh Congress Committee (NPCC)-i sangdong ka nung ashi.

"Nagaland ama state ya linük nung tamangba yimsü tilatem aliba state ka lir aser Preamble nungi item ojantem agienba ya kanga taoksatsüka aser tongtipang onük ka lir. Shitakba agibo Nagaland Chief Minister-i

iba tangatetbaji lemsateptsüla saka pai BJP tashi angaa Modi'er sorkar indang Constitution agizükog" ta Communications Department, NPCC-i sangdong ka nung ashi.

Nagaland aser Centre nung BJP-i reshikangshi mapa inyakbatem aitsür aser Nagaland Chief Minister dang tasü ita nübortem asoshi noktaktsü ayongzük, ta NPCC-issa metedaktsügo.

Sorkari miim tebilemba yur Naga telok ka tenzüktsü meranger: NTC

Dimapur, November 25, 2023

(TYO): Nagaland state sorkari kin telok ka tentettsü merangba sentong atema tebilemtsü abener ta Nagaland Tribes Council (NTC)-i ashi.

Iba sentong nung sorkari 'Zeliangrong Baudi' dendaktsütsü miim tebilemba lir. Zeliangrong nunger ya Nagaland, Manipur aser Assam nung aliba Zeliang aser Rongmei nunger lir aser parnok Tenyimi Union Nagaland (TUN) kubok Tier-III nung denra Nagaland sensotem akümtsü, ta NTC-i ashi.

Ano, Nagaland sorkari iba kin telok tasen ya Nagaland Village & Tribal Council Act, 1978 (as

amended in 2022) kubok dendaktsütsü merangba magizüker kechiyong iba ajanga sorkari iba telok nem senotsü teyari agütsütsü temelaba angutsü ta NTC-i metedaktsügo.

Tesüiba küm 11 tashi NTC-i Nagaland nung Naga nunger ajak atema kin telok temaba ama inyaka arur. NTC ya October 12, 2013 nü APO Hall Kohima nung tenzük aser onok indang Temzung aser putiotsü lir, ta Media Cell, NTC-i sangdong ka nung ashi.

"Mapang ka Nagaland nung aliba senso ajaki metokmeperi aser tetsükdaktsütem ajurua liasü. Nagaland nung aliba kintem

atema telok tajung ka maliasü aser iba jagi Nagaland Tribes Council (NTC) tentet. Iba asoshi Nagaland nung kin hoho ajak den mapang balala nung ajurutepa sendentem menogo" ta Media Cell-i ashi.

"Nagaland Village and Tribal Council Act 1978 kubok Nagaland nung kin hoho ka lira aser sorkar tetuyuba kubok inyaksangshia ora, Nagaland Tribes Council (NTC) ama non-political aser non-governmental organization ka asoshi tetsükdaktsü kecha malitsü aser onoki maneni Nagaland nung aliba kintem asoshi inyaktsü" ta NTC-isa metedaktsügo.

Manipur nung Kuki nunger ka tepset

Imphal, November 25, 2023 (Agencies): Manipur kubok Kangpokpi district nung Honibarnü arishi küm 21 tain village volunteer ka tepsetba sülen tesa mejungi kümogo.

Honibarne 2:00 ako meta mejangaba nisung kari Joupi ta ser Kuki yimtsüng ka amakdang Kuki-Zo village volunteer Khupminthang Haokip khaset.

Iba lendong atalokba sülen iba tesem nung security akangshiogo aser nisung khasetertem aputsü atema bushitepdar.

Kangpokpi district nungsa Haorathel anasa Indian Reserve Battalion (IRB) personnel dena nisung ana tepsetba sülen anogo pungu lir ano tanü iba lendong atalok.

Iba tatalokba aija Committee on Tribal Community (CoTU)-i Kangpokpi district ghonda 48 mokdangtsü aser national highways 2 o 3 nung rongsenketzung mokdang mapang telatet makai shibangtsü telemeteba agia sangdongogo.

Kuki-Zo yimtsüngtem tanen

makai amakba aitsür aser central security forces dang Joupi aser temeket aliba yimtsüngtem kümzüktsü ayongzük, ta ITLF-i metedaktsü.

Meitei telungpurtemi prangpong tajung amer village volunteer khaset. Tasütait yimdakirtemi single-barrel rifles amer amakertem den raraogo aser iba mapang amakertem kar sama ta ITLF-isa ashi.

"Meitei nungeri par züngsem kar samaba meteta aruba sülen parnok Bishnupur district nung Ngarian anasa adenshi" ta parnoki ashi.

Arambai Tenggol aser Meitei police commandos-i mashii mapang ka nung Kuki-Zo yimtsüngtem amaktsü ta ITLF-isa ashi.

Külen, Kuki Students Organisation, Churachandpur district General Secretary DJ Haokip-i Khupminthang Haokip tepsetba anema lungkak aitba sayua tanü dokan aser shishilembadak ajak shibangtsü tetuyuba agüja liasü.

All Nagaland open folk song & folk fusion tetoktepba ayonger



Kohima, Yimpoksüi/ November 25 (TYO): Tanabuba All Nagaland Open Folk Song & Folk Fusion tetoktepba December 16 nü Kohima district kubok Khuzama yimtsüng nung agitsü.

Iba tetokteba ya Task Force for Music & Arts (TaFMA) den longjemer Kekhrie Krotho-i ayongzükogo aser "String of the past, melody of the future", omen nung ajemdaker agitsü, ta chief event manager Nunese Sale-i Honibarnü Hotel Japfu nung osangbenertem den sensaksema mapang ashı.

Pai ashıba agı, iba tetoktepba ya shilem pezü kuma lemsar tokteptsü, kong sobaliba ken aser folk fusion naprongla atema telok aser kija tetokteba densema lir.

Category anaprongla nung kija tetoktepba atema senpet takoker nem 10000, tanabuba

nem 6000 aser tasembuba nem 3000 agütsütsü aser telok tetoktepba atema senpet mezungbuba nem 20000 aser tanabuba nem 10000 agütsütsü.

Paisa, taoba kum iba tetoktepba nung kin troki dang shilem agı, ajisüaka takümbo kin 10 dak temai shilem agitsü imlar ta ashıba den, Nagaland nung aliba kintem dang iba tetoktepba nung shilem agitsü ayongzükogo.

Iba tetoktepba ayongzükba nükjidongji, Naga nunger takar sobaliba ajungkettsü aser artist tajungtem bushiteta TaFMA kubok sentong balala nung state tenüng nungi shilem agitsü atema item artist tem anitetsü asoshi lir, ta pai ashı.

Iba sentong ajanga local entrepreneurs tem nema parnoki yanglutetba osettsütem tetoktepba tesem nung sayatsü

asoshi sabang lapoktsütsü, ta Sale-i ashı.

Kasa mapang nung Kekhrie Krotho-isa taruba kümtem tsüngda tribal culture & heritage dak sendakba nung national jenjang nung tetoktepba ayongzükba agitsü nükjidong lir, ta pai ashı.

Sale-i ashıba agı, tetoktepba ya nikongtsütsü 3 ako nungi tenzüksü aser iba tetoktepba reprangtsü jangrartemi anepdang 10 ako nungi 12 tashi Khuzama yimtsü telongtet nung tongtibang tesemtem sema senzütetsü.

Osang benertem den sensaksema sentong nung Kekhrie Krotho tir akieleto Tsükru, tatong tir Nongosa Sale, tongti zülür Mhathozho Khizho, senyur Kulto Naleo aser event icon Neilakonuo Metha nungeria shilem agia liasü.

NDPP CYO-i Kohima nung merekmeju sentong ayongzükba agı

Kohima, Yimpoksüi/ November 25 (TYO): Nationalist Democratic Progressive Party Central Youth Wing (NDPP CYO)-i ayongzükba Honibarnü kohima nung merekmejung sentong ka agiogo. Iba merekmeju sentong ya "Go Zero Waste for Healthy Lifestyle" omen nung ajemdaker agia liasü.

Iba sentong ya Old MLA Hostel Junction nung sentong tatsüka agir tenzük, kong Advisor for Transport and Technically Education aser NDPP Legislator CYO i/c, Temjenmenba-i alakteta jaoker ama shilem agia liasü. Sentong nungsa Kohima Town MLA Dr Tseihoutuo Rhutso aser taoba MLA Dr Neikiesalie Nicky Kire natia shilem agia liasü.

O jembiba mapang Temjenrenba-i ashıba agı, NDPP-i masetshiba sorkar ka agütsüogo aser iba ajanga state lenla balala nung tebor tajungba kuma aoba angur.

NDPP sorkar ya Nagaland nung aliba nüburtemi tang kanga nüngdaka aliba sorkar ka lir, kechiyong sorkar kubok yimden yimsüuba tsütsü tajangshiba dak ajemdaker shisatsü agütsütsü aser ano state terenlok asoshi tebilemdangba tasen benoktsü

atema yimden yimsüür taintem aser lanurtem meyoktepa lir, ta pai ashı.

Maneni pai, Chief Minister Neiphiu Rio lenisüba nung NDPP sorkari state tarutsü tajungba kuma yanglutsü asoshi asenok ket nung aliba alirongsentem dak rangloker inyaksangshidat, ta ashı.

Merekmeju sentong tajung ayongzükba atema NDPP lanurtem nem tenüng sang agütsüba den pai, iba ya mapa tajung ka lir kechiyong "cleanliness is next to godliness" ta ashı. Paisa, anogoshi merekmejua alitsü atema nüburtem nem maneni tangazükba agütsütsü ajungshia liasü.

Sentong nung Dr Tseihoutuo aser Dr Nicky Kire sentepa aliba lokti ajungshia liasü.

NDPP CYP ketcangsürtem aser volunteers tem ya Kohima district kubok constituency trok dak ajemdaker lemsa-a tesem balala merekteta liasü. Telok telemsa yamai liasü: 8 Western Angami A/C - Para Medical junction via Naga Bazar & Tinpatti; 9 Kohima Town A/C - Tinpatti via Razhü Point-D Block, DC Road-Viliethie Authority Kohima nem dustbin tenla agüja liasü.

I/A/C - Billy Graham Road via DBS-Tinpatti junction; 11 Northern Angami-II A/C - High School Junction-NDPP Head Office; 14 Southern Angami-I A/C - BOC (PHQ Junction) to Naga Hospital and 15 Southern Angami-II A/C - Lerie (CRPF Camp) - PHQ Junction aser Kohima Region Youth ketcangsürtem nem Tinpatti nungi High School tashi merektetsü asoshi nonglokja liasü.

NDPP CYO tir Imchen-i ashıba agı, constituency ajak nungi volunteer 40 nungi 50 tsüngdai parnok nem lemzüksüba tesemtem merekteta liasü. Paisa, tesem balala nungi jana bendentsü asoshi dumper truck agütsüba atema Kohima Municipal Council dang kanga pelaba lemsatep.

Merekmeju ya khen atema dang masü saka ajak khuret asütsüla ta pai ashıba den NDPP youth-i nüburtem nem tangazükba agütsütsü asoshi iba sentong tenzükogo, ta shisem.

Iba sentong ayongzükba agiba nüngdem nung NDPP CYO ketcangsürtem den Advisor Temjenmenba-i Naga Hospital Authority Kohima nem dustbin tenla agüja liasü.

Hornbill Festival nung Indian Red Cross Society-i shilem agitsü

Kohima, Yimpoksüi/ November 25 (TYO): Taruba Hornbill Festival 2023 nung Indian Red Cross Society-i shilem agitsü.

The Indian Red Cross Society-i, Nagaland aser tesem balala nung Red Cross aser parnok inyakyim indang tangazükba agütsütsü asoshi meranger.

Benjung mapang First Aid training agütsütsü aser iba den

"International Day for the elimination of violence against women" dak sendakba nung seminar agi

Dimapur, Yimpoksüi/ November 25 (TYO): Sentong nung Supervisor ICDS Project Niuland Vinotoli V Achumi aser Assistant legal aid defence counsel, Dimapur district legal services authority Michael Aye na shisalen sayur liasü.

O jembiba mapang Achumi-i domestic, socio-eco, child marriage aser phycological violence dak ajemdaker jembia aser Aye-i tetsürtem nem maongka balala agütsüba aser temzung özüng kubok parnok nem temeden agütsür aliba indang jembia liasü.

Iba sentong ya Sumi Totimi Loka, Nihokhu nungi Tokheli Zhimomi-i sarasademer tenzüka liasü.

CWULK kum 25 ajungba benjungmung mungogo



CWULD & Taxes Advisor Kudecho Khamo-i Chakhesang Welfare Union Leriechazou Kohima kum 25 ajungba sentong nung o jembiba mapang tangokba noksa nung angur.

Kohima, Yimpoksüi/ November 25 (TYO): Mejangjadaktsü lokti libaliro aser yimya yimpong ajanga sayudaktsütsü ajungshia liasü. Kasa mapang nung Khamo-i, Khristian ka maitsü agizükettetsü nükgdakba indang jembia aser ochishiba ya Chakhesang nunger maitsü südaktsütsüla ta ashı.

Maneni Advisor-isa, azümesenba ajanga nisung ka terenlok aser tanü asüng lokti tekübokba jenjangi ludaktsür ta ashı.

Iba sentong ya Vesatso Tetseo Director (Rtd) lenisüba nung agi aser Rev. Vesotsü Rhakho, pastor PUBC Kohima Tsüngrem temaotsü meshizüka sarasadema liasü. Sentong nungsa mendenbuba o Muhsa Resuh-i jembia aser CEO, tEA, Neichute aser Chakhesang Hoho Kohima tir Dozhohu Tunyi nati o tatsütsü jembia liasü.

Advisor-isa, nisung a maitsü ya sobaliba sobutsü kija agi dang

Rajasthan nung voters shilem 68-i vote agütsü



November 25, 2023 nü Jodhpur district nung Jal Shakti Union Minister, Gajendra Singh Shekhawat den par kibongi vote agütsüba temaitü sayudang tangokba noksa nung angur. Honibarnü Rajasthan nung Assembly menden 199 atema election agiogo.

Jaipur, November 25 constituency nungbo election (Agencies): Honibarnü magi.

Rajasthan nung Assembly elections agia nikongdang 6:00 ako tashi nung voters 68.24-i dang vote agütsüogo.

State nung assembly menden 199 atema anepdang 7:00 ako nungi polling tenzüka liasü aser nikongdang 6:00 ako tashi nung tembang, ta Election Commission-i metetdaktsü.

State nung Assembly menden ajak senteper 200 lir, ajisüaka Sriganganagar kübok Karanpur menden nung Congress candidate, Gurmeet Singh Koonar süadokba agi iba

Councillor representative, Asif Khokhar-i, nisung 5-6 shii pa dak azük, ta metetdaktsüba sülen police iba tesem jagi arua liasü. Iba assembly constituency nung BJP candidate Rajkumar Rinva-i Congress candidate, Anil Kumar Sharma den toktepogo.

Ano tanga tatalokba ka nung, Pali district nungbo polling agent ka süadok; paji temelungjang tashidak agi asü südi ta bilemer. Polling agent, Shanti Lal ajungbenä laoadokba sülen pa anasa aliba hospital kati anir ao, iba sülen district hospital-i anir ao saka mekümkütet.

Congress aser BJP nati iba election atema kanga meranga nübo yimtepa aruba sülen Honibarnü voters crore 5 dak temai vote agütsü.

Iba election nung BJP aser Congress na dak alia CPI (M), RLP, Aam Aadmi Party aser AIMIM party temia toktepogo. State tesem kar nung mangattep adokba dak alaka lendong tulubo matalok. Churu kübok Sardarshahar assembly constituency nung aliba polling booth ka nung mangattep adoka liasü.

Honibarnübo iba senden ya December ita tanabuba hopta nung ang tenzüksü ta jangjar. Union Minister Prahlad Joshi-i X ajanga, anogo 19 tsüngda asükwa mongpu senden anogo 15 amentsü, ta metetdaktsü.

Iba senden nungji kanga tongtibang bill asem agizüksü atema benoktsü, aser item bill Indian Penal Code (IPC), Code of Criminal Procedure (CrPC) aser Evidence Act yanglubishi bill tem lir. Tawa Parliamentary standing committee on Home-i item Act dak sendakba report renemogo.

Teti agia asükwa mongpu senden ya November ita

tasembuba hopta nung ang tenzüker aser December 25 matongdangsa tembanger.

Taruba senden nungji chief election commissioner aser election commissioners shimbä inyakyim dak sendakba bill atema-a jembitsü. Iba bill ya taküm tzüngluruwa mongpu Parliament senden nung benoka liasü saka opposition aser taoba chief election commissioner temi ashishiba ajanga magizüktet.

Iba bill ajanga CEC aser ECs mendenji cabinet secretary jenjang den kasa züngshitsü benoka lir. Tang CEC aser ECs ya Supreme Court judges den kasa jenjang nung züngshir.

Soumya tepsetba ken o nung aibelener 4 taküm piyong tepuokdak ayutsü

New Delhi, November 25 (Agencies): 2008 küm TV journalist, Soumya Vishwanathan tepsetba ken o dak sendakba nung Honibarnü Saket Court of Delhi-i aibelener pezüprongla taküm piyong tepuokdak ayutsü obendang agütsüogo.

Indian Penal Code kübok Arrla 302 (nisung tepsetba) aser Maharashtra Control of Organised Crime Act (MCOCA) ozüngtem nung ajemdaker tawa Ravi Kapoor, Amit Shukla, Baljeet Malik aser Ajay Kumar aija liasü aser Honibarnü court-i temerenshi obendang agütsür.

Kasa ken o nungsa aibelener, Ajay Sethi bo küm asem dang tepuokdak ayutsü obendang agütsü.

Additional Sessions Judge, Ravindra Kumar Pandey-isa Ajay Sethi dang senchi lakh 7.25 achiba obendang agütsü.

Tamalen IPC kübok Arrla 411 (ochimeshii auyaba oset agiba) aser MCOCA kübok nisung tepsetba nung yarisemba mesüra metetsümonga ozüng

alema inyakba nung yaritepbä aser oziüng alema inyakba ajanga ajangzükba nungi tagitarutsü agiba atema Ajay Sethi aija liasü.

Temerenshi obendang magütsüdang October 26 nü court-i pre-sentence report (PSR) tama meshia liasü.

Court-i Delhi sorkar principal secretary dang PSR agütsü aser Probationary Officer (PO) ka nem mapa nunglokjang, ta tuyua liasü.

Nisung tepsetba aser MCOCA kübok ozüng alema inyakba atema tamalen Additional Sessions Judge Pandey-i Ravi Kapoor, Ajay Kumar, Baljeet Malik aser Amit Shukla nunger aija liasü.

2008 küm September 30 anepdang züngia 3:30 ako nung TV Journalist, Soumya Vishwanathan mapa atemba sülen la gari nung kidangi aodang la khaseta liasü.

Iba mapang nungji police-i, ozüng alema inyakertemi auyatsü nükjidong nung la khaset, ta metetdakja liasü.



November 25, 2023 nü Bengaluru nung Ato kilonser, Narendra Modi-i raradang amshiba 'Tejas' tayimtsü ka nung mendangba mapang tangokba noksa nung angur.

U'khand nung ali agi anenbanga alirtem Khristmas tashi nungbo kümzüktsü

New Delhi, November 25 (Agencies): November 12 nü

Uttarakhand kübok Uttarkashi district nung tunnel ka chirepba ajanga mapa inyaker 41 anenbangba sülen tanü tashi parnok kümzüktsü merangdar, ajisüaka iba maparen nung tetsükdaktsü tuluka ajuruogo.

Tenemlen nungi Auger (machine) ajanga ali perü-a ia parnok kümzüktsü merangogo saka iba machine agi mapa meinyaki kümogo. International tunneling mongin, Arnold Dix leniba nung kümzükba maparen ya inyakdar. Honibarnü Arnold Dix-i Khristmas matongdangsa mapa inyakertemji kümzüktsü, ta nangzük.

"Ali perü-a aiba mapa anenogo. Auger (machine) atema mapa tasak liasü, joko iba machine agi kecha meinyakettüsü," ta Arnold Dix-i metetdaktsü.

Paisa, "Onoki tanga lenmang balala bushidár. Onoki shinga meyirutsü nisung 41 prongla kümzükta kidangi anir arutsü atema shisadangdar. Tenem agi auger machine magizüker,

ibayongji onoki tanga lenmang bushidár," ta metetdaktsü.

Auger machine jagi ali perü-a aiba sülen pipe tesadem ka inoka mapa inyakertemji kümzüktsü tebilemba liasü, ajisüaka ali telung perü-a aidang ali teung nung merang ajanga tetsükdaktsü ka ajuruba ajanga Hokolbar aonung iba maparen anenogo.

November 12 anepdang Uttarkashi district nung Silkyara aser Dandalgaon tsüngda Brahmakhal-Yamunotri National Highway nung tang teyengludak ongken (tunnel) chirepba lendong nung aayanger 41 ji anenbang. Iba sülen National Disaster Response Force (NDRF), State Disaster Response Force (SDRF) aser Uttarakhand Police senteper kümzükba maparen tenzüka liasü.

Tunnel atudak mapa inyaker 41 ji teimbaka Jharkhand, Uttar Pradesh, Bihar, West Bengal aser Odisha state tem nungi aayangertem lir. Mapa inyakertem rongnungsa Assam nungia nisung ana aser ka Himachal Pradesh nungi lir.



November 25, 2023 nü Amritsar nung Sikh nunger temeshi aini aotsüpürtem Pakistan nung aliba temeshi tesemtemi apusotsü lia tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜ (YIMPOKSÜ) 26, 2023

Yisu ajuruba

Nisung balalai mapang balala nung yimya balala ajanga Yisu ajurub. Nisung kari bushia oa ajurur, nisung kar dangibo Yisu arur aser nisung karbo tangar ajanga ajurub. Aji oda, koba tia nung aser koba yimya nung ajurudir ajuruang, Yisu ajururtemji tia taka. Yisu ajuruba agi tasürtem shia arur, nükpokeri angur, tsüngtsükeri jajateter, temenen tanüla agi pur kangshia alirtem salatsür aser shirangertem aneper. Yisu ajuruba agi temenen taidok angur aser teti atema Tsüngrem chir akümer. Aji oda, Yisui kümzüker ta asenok ajaki meteta lir. Ajisüaka, asenok dak tashimait kaji asenoki Yisu mebushir aser Yisui bushidanga asenoki Pa magizüker. Anungji ano, tangar ajanga Yisui asenok ya Pa dangi arudaktsüner saka asenoki iba taochi lenmangjia aiben mereprangteter. Aiben, tangar ajanga lenmang balala len nungi Yisui asenok ajar ser nung asenoki mangatetba ajanga Tsüngrem nungi taochi aser temoatsü magizükteti asenok temenen lar kümér shisaboluseta asenok alir. Tanü asenok den yangi kanga tesempatsü mapa inyaka senzüba temenen tsür kati tangar ajanga Yisu ajuruba otsü tejen ka lephria lemsatepner. Laji Yohan tapu 8 nung shia aliba nüktapangtatsürla to. Anepdang yakta ka, Olive tenem nung tenla kidang Yisui nübotem dang sayutsüngia aliba mapang ka, Farisi aser Tezürurtemi nüktapangtatsürla ya nüktapangta benshia lia pur, Iaji Yisu dangi anir aru. Atangji, Farisi aser tezürurtemi nüktapangtatsürla Yisu dangi anir arubaji temenen taidok aser tekümtet agütsüdaktsünua anir aruba masü. Parnok nükjidongjibo Yisu dak tai aputsü asoshi liasü. Ajisüaka, iba nüktapangtatsürla asoshibo Tsüngremer sentong balaka liasü. La nem taidok aser tekümtet agütsütsü asoshi Tsüngremi Farisi aser tezürurtem amshi. Iba anogo nung to la nüktapangtaya lia Farisi aser tezürurtemi mapu asünungbo, ano tang tashi Yisu majorui nüktapangta benshia senzüa lila ta kenkenbo temulung nung tipmedemi bilemer. La ya nüktapangtaya lia apu nungji, la den tebur ka dena liasü ta asenoki angateter. Ajisüaka, kechiba Farisi aser tezürurtemi kuli asütsü atema danga paji mapu aser kechiba tetsürla denji külemi Yisu dangi paji anir maru ta ano temulungjang nung tasüngdangba ka arur. Nüktapangta benshiba mapaji tebur atemabo tai masü saka tetsür atema dang tai asü ? ta asüngdangtsüsa adoker. Atangji, nüktapangtaba mapaji ajak atema tai saka iba anogo ya nüktapangtatsürla atema dang Yisui ajaba anogo ka asü südi. La pur Yisu dangi anir aodanga lai ola madok. Lai la medentsü memerang. Lai la temenen nempangtsü mebilem. Tanü tensa yimten mesüra lokti nung lenirtem kari tetsür ka tebur ka den nüktapangtaya ngur apu nungbo, ashiko tetsürla jagibo tebursangi tashiyim agi la raksatsütsü meranga liasü ta la temeden bushia nokdakla ta kenkenbo bilemer. Ibajji mesüka tangar ajanga Yisui kümzüksü ajar ser nung, asenoki asen tanurtem machimajemtsü chiajema lia tangari apudang asenoki parnok temeden indang jembir aser parnok apurtemjiang aitsür. Ibayongji, asenok tanurtem aser apuanai aika Yisuibo ajurunüseta ajar ser nung asenoki nokdangba agi Pa majurutet aser taochi mengutet samadagi. Nüktapangtatsürla nüktapangtaya lia apuba ama, asenoka aiben asenoki tai inyaka lia tangari jakdaka apur, saka asenoki tai menangzüker aser memelenshir, anungji Yisu majorur. Asenoki asenoksasa shitak inyaker asü tai inyaker-ar meteta dang lir, saka asenoki memelenshiteter. Iba ama mapang ka nung ajungbena ka tangar ajanga aseni Yisu ajurutsüsa tai benshia lia apur. Iba ama mapang nung tangar dang mejashii Yisu ajurutsüba mapang tajung ta bilema, ajemajema Yisu tsüngdang oa nokdakra, nüktapangtala dang ashi ama, Yisui asen maitsütsü. Pa tsüngdang taidok aser taochi angutsü aser tekümtet ngur pelashishia alitsü.

OLEMSABANG

ASEN LIMA LOKTI TENTET LIMA KÜMOGO (Land of unions, associations and factions)

- Dr. M. Temjen Longkumer,
Lerie Colony, Kohima

Ni asen Aoer yimtsü yimbo ka dang asüngdang, "Nai lokti kwi ka nung shilem agir aser züngsem ka ama lir?" Pai langzü, "Ni Kohima nung ozü tsükong, yimer union, Kohima Aor Telungjem, Aoli kidong telungjem, Yimer Senso Mungdang, Yimer Bendang Ali Union, Kohima Aor Officer Telungjem, Aor aser yimer students/kaketshir telungjem, ozü tebou tarensen telungjem, Züngar telungjem, KABA (arogo) nung aser ano colony/kiyong nung, Naga nunger lokti tentet balala nung ta, kar nung züngsem ama, kar nung ketdangpur, kar nung Adviser, kar nung committee aser executive member, ta lir. Ano sub-committee balala: Jubilee, Building committee, students atema, taintem atema, Fund raising committee, iba amala mesükba aika nung shilem agir. Ha, ha, pension ngur ano Pensioners' Association nung join asütsü yongyaseta atar ati." Iba amaji jila balala nung nisung aika lokti balala nung shilem agia alitsü süti.

Nisungji lokti shiruru (man is a social animal-Aristotle). Saka lokti tentet aika tenzükba yagi tajung asü tamajung teimba bener arur bilemdangtsü mapang tongja tongogo ta bilemer. Talisa asen Aortemi lokti tentet ya kanga sapur aser mela melaa tenzüker ta ajiteter. Unions, Associations, Forum mesüra Telungjem balala tenzükba yong kijai teimtem ajurudang Lokti Tentet jagi nepu, mapang, temeim (emotional needs) aser rongsen agi yariteper. Iba ya Aor sobaliba tajung ka ta bilemer. Tajunga aika lir saka majung ama bilemba kar lemsateper.

Ozü tsükong, ozü yimer, ozü telok, ya sa tajungba aser shidak ta bilemba (self-centered with ism-mindedness) yimya jagi alima nung yimjung aser tesünep (peace) bener marutsür. Tatishitsü agi, ozü telok zungsem kati aibilen nung, telok tenung nung pa tepu akumba (supporting or justifying wrong doings). Khen khenbo telok kati dangar telok ka aitsüba mesüra amokmerenba osang kakettém nung angur (paper war). Telok tentet balala omentem ji reprangdangra, Telungjem, Terenlok, Tejakleni, Linük Asoshi, Nuberem Asoshi, ibamala nükjidong ayuba angur. Anungji, lokti tentet ka jagi telungjem aser yimchiyimjung bener arur asü masü khen jungjunga shisadangti.

Lokti tentet ajak jagi Decadal Year, Silver Jubilee, Golden Jubilee, Platinum Jubilee, Centenary, 125 years (QOC), 150 years (SQC), amongtsü bilemer. Tsüngremer temoatsü aser temeim bilemtetta amungba (celebrations) ji tajung saka iba yagi khuret ang teimba aser tuluba bener arutsüra ajibo kangabo jangratemtsü masü ta bilemer. Lokti tuluba nungi tilaba tashi ajaki Jubilee sentong tulu ayongzüka amungba yimya yabo khen bilemdangtsü nungdaker. Kokra kum 50, 100 aser 150 dang among nung ajungtsü.


Ano Naga linük tenzüker (Naga National Workers) tsüngta nunga telok (factions) onsara kumogo. Iba ya parnok tsüngta nung meputepa agi mesüra tashi toktepa ka dang sera telok aika aliba jagi lokti nung teimtem adokba den Naga nungerem nükjidong atongtsü asaktsü.

Joko benjung mapang arudaki. Item lokti tentet ajonga jagi Khristmas aser Kum Tasen benjungmong mongnüttsü. Pelatepba amungbaji junger saka iba yagi kija/kibong kar nungbo teimtem ang tali bener arutsü akok aser nisung karbo "ana kuma shidanger" (split into two persons) dang inyaknúa li ta petteptsü.

Lokti tentet ajaki pei temeten (rights) dang bushitsü atema masü saka ner lokti tentet jagi alima nem kechi tajangzük agutsür ta asüngdangti: tat. agi, yimchiyimjung, rongsenketsüngren nung, alima tejakleni aoba nung, aser yimjung bener aruba nung yaritsü junger ta bilemer.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeri angateta agitsü mepishir**

Ebenezer Prayer Centre nung Nagaland inukate macrusade agidar



Ebenezer Prayer Centre, Tsiese nung "Prayer for the Naga Nation" crusade mezüngü sentong nung Rev. David Koza-i Tsüngrem O jembidang tangokba noksa nung angur.

Tsiesema (Kohima), November 25 (TYO): Hokolbarnü Ebenezer Prayer Centre, Tsiese Basa (Tsiesema) nung anogo asemnū "Prayer for the Naga Nation" crusade tenzükogó.

Iba crusade omenji "Ajisüaka metsüjang kar ali tajung nung tsüka mendi adok. Kari noklangbena, kari rokerbena aser kari semerbena tejang atang," (Mathi 13:8) lir; iba crusade ya November 26 nü tembangtsü.

Crusade mezüngü Tsüngrem O jembidang Chakhesang Christian Revival Church Council (CCRCC) Executive Secretary, Rev.

Paisa, Khristan ka taküm nung agütsüba aser tenlaba ya tashi tulu aketba hadir ka lir, iba denji külemi tangar nem

agütsübaji jungjunga shisadangtsüla, kechiyong tai agütsüba ajanga meimchir taküm nung tetsüdkaktsü bener arutsür, ta ashi.

Paisa, tatishitsü agi nai kiralongrak ka nem prangpong agütsüra iba prangpong jagi meimchirtem atema teraksatsüba tulu alitsü, saka nai sepi tajung ka nem prangpong agütsüra iba jagi tsükchirtem nungi kümzüktsü, ta metedaktsü.

Anogo asemnū crusade ayongzükba nükjidong ya Naga nunger tsüngda yimjung aser telongjem alitsü atema ayongzük.

Ebenezer Prayer Centre, Tsiese Basa-i ayongzükba sentong ya Visasielie Suohuo aser par kibongi katsür.

Anogo asemnū crusade nung o jembirtemji Rev. David Koza, Executive Secretary CCRCC, Chetheba, Vezokho Vero, Pastor, Naga Shisa Hoho Prayer Centre,

Prüzhie, Nini Sekhose, Advisor, Council of Christian Revival Churches, Nagaland (CCRCN) aser Naga National Prayer House, Yoruba nung pastor, Vezalhu Chakhesang nunger lir.

Tsüngremi jembiba lemsatepdang Ebenezer Prayer Centre Chairperson, Gloria Pienyü-i, timtem balala atema Naga nungertem sarasadem aser lumiba ajanga renema alitsüla, ta metedaktsü.

Gloria-isä, taruba Hornbill festival nung lanur tetsür-tebur aika temenen matsüngdang tsüktü, ta shia Naga nungertem, talisa sarasadem nung tamangtirtem dang temenen sentong nungi kümzüktsü atema lumia sarasademtsü ayongzük.

2019 küm tenzükba Prayer centre ya Assam Rifles camp 5 Sector HQ kubok lir aser iba centre nung ana aser talang nungi aika tanela chiyungtsü anguba den külemi tanepstsüba ngudar.

tebur temejai ken ka aten; Sumi Baptist Church, Sepfüzou aser Koinonia Baptist Church, Senior Choir temia ken aten.

Honibarnep 10:00 ako nungi tenzükä kentenba sentong ka agi, aser iba sentong nungi Arogotem, reju balala aser nijatemi shilem agia liasü.

Nikongdang Phezoucha Baptist Church, Kohima nung pastor aser taoba mapang KBC nung azünger, Keduoneituo Yhome leniba nung sentong agi aser tongti o

jembirji taoba mapang KBC graduate aser Cathedral of Praise Now Generation Outreach Revival Assembly, Shillong, Meghalaya tentetsang aser pastor, Rev. Dr. Baptkupar Dunai liasü.

Kasa sentong nungsa Kezhalelie Khana leniba nung Kohima Bible College nungi

ANOGO ABEN TSÜNGREM DEN

NE KULI

Ne kidangi ne tembartem dang oang, aser kibubai na asoshi mapa koda tulu inyak, aser pai ne dang koda yimlibilem, parnok dang shiang. Mark 5:19

Adianu ka küm aika mapa mangu liasü. Mapa nung joko over age asütsü küm nung kanga dang taochi tulu ngua mapa angu. Saka iba adianu yagi kodanga mapa pelaseta magizük, pa tata mapa shilem surnung aiben nemnema tenzük.

Kibubai na asoshi koda taochi mapa inyak. Kibubai nu dang yimlibilem tulu sayu. Adianu nai kechi küli agütsür. Taküm lla aotsuji nemnema, jashia masü saka kibuba ajanga nu taküm jenjang pelaseta anogo shi jajatsü koda tajung. Taküm ka ji küli agütsüa, medemer dang, na aliba anasa den osang tajung ashitsu ji kibubai aginer. Tanü na aser ni kibuba tajung indang küli sudi arung.

SARASADEM:

O Kibuba nai agütsüba kuli tajung ji shia litettsü nai ni yariang ma. Amen

Arogoi maneni yimti-yimdong nung sayutsüngitsü: Gary Marsh



November 25, 2023: Taoba hopta Victory Chapel First Phoenix Arogo nung outreach director, Hans Schmidt-i yimti lenmang nung sayutsüngiba mapang nung nisung kari pa dak injang khaloktsüba ajanga pa kanga mejungi yirua hospital-i anir oa liasü.

Pastor Marsh-i, "Asenoki Tsüngrem mapa inyakba kodanga manentsü. Yimti yimdong nung sayutsüngiba manentsü. Outreach mapa inyakba aser Khrista osangtajung lemsatepbä manentsü. Tesamaba lima atema Yisu Khrista tenüng sangdongba manentsü. Iba Arogo nung item mapa ya kodanga manentsü," ta metedaktsü.

"Ni nenok dang ya züngborg nangzüker, ni meliaka kü sülen tenzükeri ano kü dang nungi tajungba alia oa inyaktsü. Iba atemaji bilema alitsüla. Tamangertem longjembä ama asenok aji oda lir," ta pastor-isa metedaktsü.

Taoba Bodhbarnü (November 15) outreach

AO OSHI ANGAZÜKDAK:
TANÜ ANGAZÜKTSÜBA OJANG
**Senchimenchi**

(n) yimteni aibelener dang pei tai yari senotsü, nashi, ak aser kimunglumung agiba (penalties)

* Yimten tashi meitra senchimenchi magitetter.

Sentak

(v) lisü agi meser ayuba (tie up)

* Mamatzü ayimtsü atema ozü nashi kima sentaka ayu.

OLONG PAITEP # 6625

1			2			3		4
5		6						
						7		
8								
								9
10					11			
			12			13		
14								
					15			
16								

TIPLÉN

2. Auonungchiyongtsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenuk agi ajitet
15. Tamajung aküm
16. Apuso

LANGTSÜNGLEN

1. Lenmang
2. Aor kidong ka tenüng
3. Tenarong maten
4. A_ _ _ g
6. Mopung apodoka
8. ola adokdaktsüba
9. Tongtipang tagitsü
10. Menungra bilem
11. Aiür
13. S_ _ _ k
14. T_ _ _ r

OLONG PAITEP # 6624 TELANGZÜBA**TIPLÉN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.



November 25, 2023 nü Prime Minister Narendra Modi-i combat fighter aircraft Tejas nung mener senzüa liasü. Honibarnü PM Modi-i Bengaluru nung amenoka aliba defence PSU Hindustan Aeronautics Limited semdang aser idangji pai tayimtsü nung mendanga liasü. Tejas ya India nung yangluba single-seater fighter aircraft ka lir saka tanü Indian Air Force-i twin-seat trainer variant nung PM Modi anir senzü.

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura nung tebu kati Rs 30,000 yong jala yokdokba kümzükogo
Agartala, November 25, 2023
(Agencies): Khowai District Administration-i kinü tanur ka kümzükogo. November 23 nü Khuchen Debbarma-i par tanur tetsür Rs 30,000 yong yokdok.

Khuchen Debbarma-i pa kinungtsü mejanga lia par kibong khuret ajanga jala yokdok ta osang angazüker. Anogo ka ser tesadang tain kinü tanur tetsürji tanur maliba apuani ka dang yokdok.

“Tanutsüla tetsüua tanurji agütsüna liasü. Tanur maliba apuani ka nem tanur agütsütsü nangzüktepa iasü aser iba jagi tenati tanur asotsü atema senotsü agütsü” ta Khowai District Magistrate Chandni Chandran-i ashi.

Tanur asoba sülen apuani nati Rs 30,000 agütsü aser tanur anir ao. Tetsüibo tanurji odang agütsünür. Parnok ya arem nung alir sensakertem lir, ta Chandran-isa ashi.

“Gomati District kübok Karbook nungi kibong ka nungi kinü tanur ngutetogo. Iba mapa nung Teliamura Sub-division Child Development Project Officer aser Childline-i kanga meranga inyakba atema tenüng sang agütsü” ta laisa ashi.

Khandu aser Rijiju nati meta talang alidak semdanger

Itanagar, November 25, 2023

(Agencies): Union Minister for Earth Science Kiren Rijiju aser Arunachal Chief Minister Pema Khandu nati Arunachal nung meta talang pilar aliba tesemtem semdanga Lok Sabha aser Assembly elections atema nüboiyimer.

Honibarnü tena West Siang district headquarters Aalo nung

aliba Advance Landing Ground nung helicopter ajanga oa anenzük.

Aalo jila nung mega rally alidang nisung meyirjang aika aden aser mapatong aika lapoktsü.

31 Aalo East assembly constituency nungi tang teinyakkadak MLA Kento Jini maneni takok ngudaktsütsü nükjidong nung iba sentong

Assam nung BJP aser teyaritepetemi LS menden 12 angutsü

Guwahati, November 25, 2023 (Agencies): Lok Sabha elections nung Bharatiya Janata Party aser onok den yaritepetemi constituency 12 nung takok angutsü ta cabinet minister Pijush Hazarika-i ashi.

Rangia nung nisung aikati BJP nung züngsem akümba aser karyakarta sammelan nung Minister Hazarika-i iba osang metedaktsü.

“Tesüiba anogo 20 shi ka Assam kübok district aika sema ogo aser public senden 10 nung denogo. Anogo 20 nung ajangshia aruba ajanga Bharatiya Janata Party aser onok den yariteper teloktemi sangküm Lok Sabha elections nung constituency 12 nungbosa takok angutsü ajitetogo” ta paisa ashi.

“Tanü Assam nung BJP-BJP ta asüba tensa ka lir aser ni aolen ajaklen nisung meyirjang aika aden shir” ta Hazarika-isa ashi.

Chief Minister Dr Himanta Biswa Sarma aser Prime Minister Narendra Modi nungeri aniba BJP sorkartemi mapa meiyaktet süra onok

sentongtemi nisung meyirjang aika marutsü. Iba jagi tanü nisung aika aden shir kechiyong sorkari nübor tem asoshi inyaker” ta paisa metedaktsü.


Nübor temi Congress party sempar aser tanga party tenüngtem memetet. Congress, AJP aser People's Party aitsür aser AJP indang MLA ka dang mali, ta Minister Hazarika-isa ashi.

Ano kulen Rajor Dal ta ser party ka lir aser parnok MLA ka lir aser tanüngba nisungji Assam nungeri memetet, ta paisa shisem.

Küm ana tsüngda Akhil Gogoi-i nübor tem den tesentaktep kecha mali aser tang pai bicycles kar ajanga sendaktep nübor tem asoshi inyaker” ta paisa ashi.

“Congress party den party 15 dena lir saka item teloktem nung züngsemtemi iba teloktem tenüng memetet. Nübor temi item telok dak mamangba agi tanü Congress, AJP aser Rajor Dal züngsemtemi BJP nung adener” ta paisa ashi.

Chief Minister Dr. Himanta

SÜR KÜM 25 AJUNGBA BILEMTETER

IMKONG LONGCHAR
ASÜ: 26.11.1998

Mongputem arur ogo,

Tejashi aser temulung rongsaba ajanga tarak kettsüogo,

Na kü anasa lir ta bilemba kodanga mamar,

Mapang süia aodang tanepstsü angur ta ashir, na teti atema alitsü orr küm 20 tema süia arur,

Saka ana mezüng ajurutepdang bangzungtepba mesama lir.

Asenok yakta ajuruteptsü atema alir.

~ Temeim kinungtsü aser tanurtem.

ayonga agi.

2019 election nung Kento Jini den tetokteper shinga melii takok angu aser sangküm election nung Aalo East nungi BJP candidate asütsü shimogo.

Tanü agiba sentong nung political party balala nungi züngsem 700 temai BJP nung aden.

Logum Jini playground nung nisung aika aden shir a team pelar ta CM Khandu-i ashi.

Aalo jila melenshiba angudang kanga pelar aser iba ya MLA Kento Jini-i kanga meranga inyakba ajanga lir ta pai ashi.

Iba sentong nung Industries Minister Tumke Bagra, MLA Talem Taboh, Nyamar Karbak, taoba Minister Doi Ado aser BJP lennirtem aden.

Biswa Sarma aser BJP president Bhabesh Kalita na lenisüba kübok Assam kübok tesem ajak nung BJP tashitaitba kümogo, ta paisa shisem.

Iba sentong nung paisa Arunodaya scheme indang senotsü teimba kümtsüba metedaktsü. “Onoki Rs 850 nungi Rs 1,000, Rs 1,000 nungi Rs 1,250 kümtsüba aser taruba ita ana tsüngda Rs 1,450 kümtsütsü” ta Minister Hazarika-i metedaktsü.

“Chief Minister Sarma-i nangzükba ama küm ana ser tesadang tsüngda mapa manguba lanurtem 87,000 nem mapa agütsü. Ano taruba küm ana ser tesadang tsüngda lanur 45,000 nem mapa agütsütsü” ta paisa ashi.

Assam nung Himanta Biswa Sarma-i aniba BJP sorkari Medical college 18 yangluogo. Onoki Assam nung Arunodaya bentsür aruogo aser microfinance atema loan agütsür. Tanü state sorkari constituency ka nung lenmang aser apu yanglutsütsü atema Rs 50 crore agütsür, ta paisa metedaktsü.

Russia-i drone 70 dak tema amshia Kyiv amak



Bakhmut, Donetsk tesem Russia nunger drone-i raksatsüba bus ka süia Ukraine nunger sapaitem aoba noksa nunger.

Kyiv, Yimpoksü/November

25 (Agencies): Manger mesangwa tsüngda Russia-i drone 70 dak tema amshia Kyiv amakba sülen nisung pongu tashi yiruogo, ta Ukraine nunger kettangsürtemi metetdaktsü.

Tir Volodymyr Zelenskyy-i, linük yimtiba amakba ya kiralongrar inyakyim ka lir ta Telegram app ajanga ashi. "Parnoki nisung tepsetteter ta asüba yagi Russia nunger lenirtem nema adanger," ta tir-i ashi.

Kyiv ya Iran nung yangluba Shahed kamikaze drone tem amshia amak. Honibar anepdang züngia Kyiv kubok district balala amak tenzük aser anü atokba sülen ano drone aika yoka maka liasü. Ari raid warning ya ghonda trok dak tema agüja liasü.

Air Force tekolahba Mykola Oleschuk-i ashiba agi, Kyiv amaktsü asoshi drone 75 yokba nungi 71 khazüka yokogo.

Paisa, "mobile fire" units temi kanga yakyaka iyaksangshia drone tem khazüka yokba atema parnok nem tenüngsang agüja liasü. Oleschuk-i ashiba agi, iba unit yagi drone shilem 40 shi khazüka yoka liasü.

Kyiv mayor Vitali Klitschko-i Telegram ajanga ashiba agi, iba lendong nung arishi küm 11 tain tetsür chanu ka densema nisung pongu yiruogo aser yimti kubok district balala nung kitem

raksatsüogo.

Drone khazüka yokba ajanga tanurtem nursery ka nung mi adoka liasü, ta paisa metetdaktsü.

Russia nunger temi koba tesem dak rangloker drone tem yoka liasü iba indang osang tejangja memetet, saka Ukraine-i tawa Russia nunger temi Ukraine indang energy system raksatsütsü asoshi jenjang agitsü akok ta tekümdangtsü metetdakja aradar.

Ukraine indang energy ministry-i ashiba agi, linük yimtiba nung nisung aliba ki 77 densema ki noklang anashi nung electricity makai kümogo.

Kasa mapang nung Ukraine indang air force-i ashiba agi, 2022 küm February ita nungi Ukraine amak tenzükba sülen tang mezüngbuba Russia-i drone timba amshia Kyiv makogo.

Al Jazeera osangbener Rob McBride-i Kyiv nungi ashiba agi, Russia nunger sepaitem asükwa maru tsüngda Ukraine nung tongtibang infrastructure tem raksatsütsü meranga inyaksangshidat.

"Iba ya Kyiv aser tanga yimti nung alirtem atema tebilemtsü ka lir, kechiyong Russia nung temi tongtibang infrastructure aser taoba küm ama power supply raksatsütsü meranger," ta pai ashi.

Maneni Kyiv-ia, Ukraine anütoklen aser Crimean peninsula nung June ita nungi tenzükia Russia nunger military installation tem drone aser missile tem amshia aiben maka arudar, aser iba ajanga Russia nema takoksa bener arutsüogo.

Ano Hokolbar anepdang Russia indang missile defences-i, Cremia nung Ukraine nunger indang drone 13 aser Volgograd tesem nung drone asem khazüka yokogo, ta Russia indang defence ministry-i ashiba local media sangdong balala ajanga metetdaktsü.

Zelenskyy-i Hokolbarnü ashiba agi, Ukraine-i bendanglen takok tongtibang asem akoktsü nüngdaka lir, kong United States Congress aser European Union nungi teyari asoshi temelaba angutsüba aser European Union nung Ukraine züngoksemtü atema formal sensaksem tenzüktsüba densema lir.

Russia-i Ukraine amak tenzükter ita metsü jungogo aser anüolen aliba linüktemi Kyiv nem teyari agütsüba agi lakteta kümder, koba Kyiv asoshi tetsükdaktsü tulu ka lir, kechiyong parnok Russia den raratsü atema military aser rongsenketzung dak sendakba nung teyari balala aser humanitarian teyari balala asoshi anüolen alinük linüktem dang metaloker lir.



Beijing nung tanurtem mozüki ka kima nüburtem gari atatepba noksa nung angur. China nung tanurtem tangola junga mesashiteti shirangba tashidak ka tali küma aoba sülen World Health Organization (WHO)-i iba tesa asadangogo. WHO-i China dang tashidak indang data meshiogo, saka beijing-i Hokolbarnü ashiba agi, masüba mesüra novel pathogens kecha meputet.

Molungnen O

Onok asür **A.Watitemjen**

Ao'er kinungertemi, temeim kinungbo, tebu aser oboula shiranga aliba mapang aser asüba anogo tashi nung kidanger, kinunger aser tembartem shirnokisa onok dang temeim sayuogo nenok ajak dang kanga pelaba lemsateper. Nenoki onok dang temeim sayuba ya onoki teti bilemtettsü.

~ Asür A.Watitemjen

**Ao'er (Chuchuyimlang)
Kinungertem.**



October-14.1952
November-19.2023

Afghan refugee tem dang 'Exit Fee' meshiba atema Pak aitsü

Islamabad, Yimpoksü/ November 25 (Agencies): Taliban-i rishikangshiba ajanga linük toktsür jena aoba Afghan nunger refugee tem dang exit fees ama USD noklang aika meshiba atema anüolen aliba linüktem nungi diplomat tem aser United Nations-i Pakistan aitsüogo, ta Guardian sangdong ka ajanga metetdaktsü.

"Iba ken o ya UN agency; [UN refugee agency] UNHCR aser [International Organization of Migration] IOM natia ashishiogo. Iba ya linük yimtibatem aser headquarter tem nunga ashishitepogo aser ajaki Pakistan nem osang agütsür alitsü ta amanger," ta lenir yagisa ashi.

Taa agiba indang asüngdangba mapang, mezüngbo nisung shia dang USD 10,000 meshitsü telemtetba agi saka ajemshitsür USD 830 dang kümogo.

"Iba inyakyim ya khenyongi balaka aser iba ya angashia nia kanga tezü adanger. Pakistan-i refugee tem tanga tesem nung oa amenoka alitsü asoshi inyakyim nung teyari agütsüti süra parnoki iba amala inyakyim benoka ken o tebenjaba mekümdaktsütsüla. Exit fee meshiba tetzü ya kechi? Sen aika aatsü atema asü," ta tanga diplome kati ashi.

Exit permit ya credit card ajanga agütsütsüla, koba Afghan nunger refugee aika ket nung mali.

Kasa mapang nung Pakistan foreign ministry otongdar Mumtaz Zahra Baloch-i ashiba agi, iba policy ya melenshitsü asoshi kecha tebilemba mali.

"Item nisungtem ya taoba küm ana tashi Pakistan nung alir aser parnok ya refugee masü saka immigrant tem lir, shirnok visa nung atakzükja aliba mapang dang nungi talila liogo aser kuli kaket peria mali. Ajisüaka onoki ken o dak sendaka aliba linüktemi parnok indang visa agizüksü atema takaratiba nung inyaksangshitsü imlar, ajita asünungdang parnok takaratiba nung otetsü," ta lai ashiba Guardian-isa metetdaktsü.

"Pakistan atema rongsenketzung nung tetsükdaktsü adoker ta meteta lir, saka refugee tem dang nungi

AKTD-i ayongzükba "ASEMANG" sentong takok nung temogo



Dimapur half marathon aser 10k run nung takok angurtem tangokba naoksa nung angur.

Diampur, Yimpoksüi/ November 25 (TYO): Dimapur Ao Kaketshir Telungjem-i, "ASEMANG" ta nüngja agütsür mezüngbuba Dimapur Marathon sentong ayongzükba November 25 nü kanga takok ngua asayaogo.

Meghalaya nungi arishi küm 22 tain Daniel Lyndoh-i Dimapur Marathon title benogo kong asayar noklang ka dak temai 21k run nung ya shilem agia liasü.

Tetsür aser tebur naprongla atema marathon asemteper ya km 21.097 ayimjema asem aser iba den tetsür aser tevbur

naprongla atema ano 10 km Red Ribbon Run ka ayongzükka asemogo.

Daniel shibai half marathon title bena liasü pa nem senpet sen lakh ka agütsü aser tanabuba jenjang nung tembangsang H Ngaopulou nem senpet sen 50000 aser tasembuba Wede Tmero nem senpet sen 20,000 agütsüogo.

10k Red Ribbon Run female category ya Assam nungi Rinky Kumari Chauhan-i akok aser tanabuba aser tasembuba jenjang nung Makak Mayum Minarashi aser Cekrotalu na liasü.

Tebur asemteper ya M Nokching Chang-i akok aser tanabuba aser tasembuba jenjang nung A Marikho aser Tsole Yhokha na liasü.

10k Red Ribbon Run akoker nem senpet sen 25,000 aser tanabuba aser tasembuba jenjang nung takok angur nem senpet sen 15,000 aser 10,000 agütsüogo.

Marathon kong asemteper 600 dak temai shilem agia liasü, iba asemteper ya Advisor, Labour, Employment and Skill Development Moatoshi Longkumer-i DDSC stadium nungi tenzükba liasü.

UEFA Champions League: Rashford Galatasaray den masayatettsü

Yimpoksüi/November 25, 2023 (Agencies): Champions League nung Manchester United pur taruba hopta Galatasaray den asayatsü aliba asaya nung Marcus Rashford masayatettsü, kechiyong pa nem asaya ka atema tenokdangba agütsüogo, ta UEFA-i jangashitsüogo.

Iba ita tetenzüklen Copenhagen goal 4-3 agi makokba asaya nung Elias Jelert dak foul menaba atema Rashford nem red card agüja asaya nungi tugudaktsü.

United manager Erik ten Hag-i pa nem red card agütsü malang liasü aser pa kanga mejungi merenshiogo ta ashi, ajisiaka VAR review ka agiba sülen referee Donatas Rumsas-i temerenshi agütsüba ya UEFA-i agizükogo.

"Kodang noksa freeze südaktsüdir idangji kanga majung angur ama bilemer. Iba amala telemtetba agiba atema

ni kanga tezü adanger. Asaya ya yama asütsübo masü. Iba ya football dak kecha sendaka mali," ta Ten Hag-i ashi.

Copenhagen makokba ajanga United pur Champions League knockout stage-i aitsü maitü mejangia kümdaktsüogo.

United pur Group A nung tang point asem dang nguteta ponglang nung lir. Bodhbarnü Galatasaray mekokra parnok iba asayamung nungi tsükotksü.

Kasa asayamung nung Galatasaray den mezüngbuba leg asayaba mapang United pur asaya goal 2-3 agi mekoki liasü. Asaya tatemtsü lia Argentina nunger forward Mauro Icardi-i minute 81buba nung goal ka idaktsüba ajanga Galatasaray nem takok agüja liasü.

Denmark nunger striker Rasmus Hojlund tawa international break mapang Luton den asayaba mapang

tetsü yirur aliba ya tajungba küm Galatasaray den taruba asaya nung shilem agitetsü Ten Hag imla atadar. Pa Deobarnü Premier League nung Everton den asayatsü aliba asaya nunga shilem agitetsü akok, saka pa fitness dak sendakba nung tama tetendangba ka agirang jangjatsü.

Luke Shaw tebi yirur aliba tang tajungba kümogo. Pa August ita nungi asaya ka nung danga shilem magiteti aruogo. Goalkeeper Andre Onana-a Cameroon den asayaba mapang yiruba ajanga masayateti lir tang tajungba kümogo aser asayatettsü. Maneni United nungi asayar Christian Eriksen temekok yirur lir aser Jonny Evans-a tebi nung tebilemtsü ka adoker lir.

Ten Hag-i ashiba agi, Mason Mount-a temang nung timtem ka lir aser Everton den masaya tsüngda ibaji asadangtsü nüngaker.

Assam-i NIEPA NE open TT championship team event kokogo

Diampur, Yimpoksüi/ November 25 (TYO): Tang asaya aliba 3buba NIAPA Northeast Open TT tournament tanabuba anogo national games bronze medalist Shankab Gautam Baruah aser Agniv Bhaskar Gohain nati anir Assam team-i team event kokogo. Iba asayamung ya NIAPA mini stadium, Chumoukedima nung tang asayadar.

Team asaya ya league format nung asaya aser team pezüprongla kati ka den kija, tarep aser tarep temeyoktep asaya liasü.

Team event nung Assam team-i point 55 ngua takok angu aser parnok sülen tanabuba jenjang nung Mizoram (50 points), tasembuba nung Naga Warriors (22 points) aser pezüngbuba Nagaland Senior team (9 points) liasü.

Champions Assam team nem senpet sen 90,000 den kuli kaket agütsüogo aser Mizoram team nem senpet sen 50,000 agütsüogo.

Asayamung ya tasembuba anogo nung individual events tem asayatsü, kong tetsür aser tebur naprongla, kija aser tarep asaya asayatsü. Iba asayamung nung Northeast India nungi top seeders tem asayadar. Asayamung Hombarnü tembangtsü.

Uday Saharan lenisüba nung India team U19 Men's Asia Cup asayatsü

New Delhi, Yimpoksüi/ November 25 (Agencies): Board of Control for Cricket in India (BCCI)-i Honibarnü taruba Asian Cricket Council (ACC) Asia Cup men's U19 asayamung atema asayartem sangdongogo.

Iba asayamung ya December 8 nü tenzüktü aser December 17 tashi asayatsü. Iba asayamung nung India team mezüngbuba asaya Afghanistan den December 8 nü asayatsü.

India team nung asayartem yamai alitsü:

Arshin Kulkarni, Adarsh

Singh, Rudra Mayur Patel,

Sachin Dhas, Priyanshu Moliya,

Musheer Khan, Uday Saharan (C), Aravelly Avanish Rao (WK), Saumy Kumar Pandey (VC), Murugan Abhishek, Innesh Mahajan (WK), Dhanush Gowda, Aaradhya Shukla, Raj Limbani, Naman Tiwari. Travelling standby players: Prem Devkar, Ansh Gosai, Mohammed Amaan.

Reserve players: Digvijay Patil, Jayanth Goyat, P Vignesh, Kiran Chormale.

China Masters: Satwiksairaj aser Chirag na final-i iogo



Satwiksairaj Rankireddy aser Chirag Shetty

Yimpoksüi/November 25, 2023 (Agencies): India nunger rongnungi tebur tarep asaya nung nüngtugu asayar Satwiksairaj Rankireddy aser Chirag Shetty nati Honibarnü China Masters Super 750 badminton tournament tebur tarep asaya semifinal nung China nunger tarep He Ji Ting aser Ren Xiang Yu na koka final-i iogo.

Taoba mapang World No. 1 India nunger tarep yagi mezüngbuba BWF World Super 750 title taoba küm French Open nung koka liasü aser tenati iba asayamung nung tawa tentetba China nunger tarep He aser Ren na 21-15 22-20 agi kokogo. He aser Ren nati taoba hopta Japan Masters nung kanga junga asaya titel bona liasü.

Top seeds India nunger tarep ya iba asayamung final nung ano China nunger tarep ka den asayatsü. Tanabuba tebur tarep Asayamung level balala atema ranking points aser senpet balala agütsür. Points aser senpet timtibaji Super 1000 level atema agütsür.

BILEMDANGANG

"Seplasepshiba nisung dak tamang akatsü tasak."